

## REGLUGERÐ

um möskvastærðir botnvörpu og flotvörpu og um  
lágmarksstærðir fisktegunda.

### 1. gr.

Lágmarksstærð möskva botnvörpu skal vera 135 mm. Þó má lágmarksstærð möskva humarvörpu vera 80 mm og lágmarksstærð möskva rækjuvörpu skal vera 45 mm í vængjum, aftur að fremsta horni neðra byrðis og 36 mm í vængjum, aftan við fremsta horn neðra byrðis, í efra byrði, neðra byrði og poka.

### 2. gr.

Lágmarksstærð möskva flotvörpu skal vera 135 mm. Þó má lágmarksstærð möskva flotvörpu, sem gerð er úr baðmull, hampi, polyamidetrefjum eða polyester-trefjum, vera 120 mm.

### 3. gr.

Þegar möskvi er mældur, skal hann teygður horna á milli eftir lengd netsins. Skal þá flöt mælistika, sem er jafn breið leyfilegri lágmarksmöskvastærð (sbr. 1. og 2. gr.) og 2 mm þykk, komast auðveldlega í gegnum möskvann, þegar netið er vott.

### 4. gr.

Ekkert skip má við veiðar nota nokkurn þann útbúnað, sem þrengir eða herpir á nokkurn hátt möskva þá, sem lýst er í 1. og 2. gr. reglugerðar þessarar. Þó skal ekki teljast ólögmaett:

- A) að festa segldúk, net eða annað efni undir poka botnvörpu í því skyni að forða eða draga úr sliti.
- B) til 31. desember 1975 að festa við botnvörpupoka að ofan slitvara eða hlífar, til að koma í veg fyrir slit. Skal um slitvarana eða hlífarnar fara eftir einhverri af þessum upptalningum:

1. Netbútar með möskvum, sem ekki eru smærri, þegar þeir eru votir en möskvar nets þess, sem netbútin á að festa við, að því tilskildu að:

- a) netbúturinn sé aðeins festur við pokann að framan og á hliðunum,
- b) breidd netbútsins sé a. m. k. hálf önnur breidd þess hluta pokans, sem hann þekur og er breiddin mæld þvert á langlínu pokans og
- c) ef um pokagjörð er að ræða, ná netbúturinn ekki lengra fram en sem nemur fjórum möskvum fram fyrir pokagjörðina og ekki lengra aftur en sem nemur fjórum möskvum fyrir framan kolllínumöskva. Ef ekki er um pokagjörð að ræða, má netbúturinn ekki ná lengra fram en sem nemur þriðjungi lengdar pokans, mælt ekki skemur en fjórum möskvum fyrir framan kolllínumöskva.

2. Netbútar með möskvum, sem eru ekki smærri þegar þeir eru mældir votir, en möskvar nets þess sem búтана á að festa við, og að því tilskildu að:

- a) hver bútur um sig sé festur að framan aðeins þvert á langlínu pokans,

- b) hver bútur um sig skal vera a. m. k. jafnbreiður pokanum og skal breiddin mæld þvert á langlínu pokans við samskeytin og
- c) hver bútur um sig sé ekki lengri en sem nemur 10 möskvum og fari sam-  
anlögð lengd búta ekki fram úr tveimur þriðju hlutum lengdar pokans.
3. Netbútur úr sama efni og pokinn, með helmingi stærri möskvum en hann, þegar þeir eru mældir votir, festur við pokann að framan, á hliðunum og að aftan, þannig að hver möskvi bútsins falli saman við fjóra möskva pokans.

### 5. gr.

Þrátt fyrir ákvæði 1. og 2. gr. mega þó skip, er veiða makríl, sild og skyldar tegundir, loðnu, ál, fjörsung (*Trachinus draco*), spærling, sandsíldi, kolmunna eða lindýr hafa innanborðs og nota net með smærri möskvum en þar greinir.

Skipum, sem stunda veiðar með smáriðnum botnvörpum eða flotvörpum skv. ákvæðum 1. mgr. þessarar greinar eða með humar- eða rækjuvörpum skv. ákvæðum 1. gr., er það aðeins heimilt að því tilskildu að, a) að slík veiðarfæri noti skipin aðeins til þess að veiða þær tegundir sem veiðarfærin eru gerð fyrir og b) að öllum fiski, sem í þau fæst og ekki nær lágmarksstærð þeirri, sem lýst er í 6. gr. reglugerðar þessarar, verði þegar fleygt útbyrðis.

### 6. gr.

Bannað er að hirða nokkurn fisk, sem er smærri en greint er hér á eftir. Lágmarksstærðin er mæld frá trjónuoddi að sporðsenda:

|                                                      |        |
|------------------------------------------------------|--------|
| Þorskur ( <i>Gadus morhua morhua</i> ) .....         | 43 cm  |
| Ýsa ( <i>Melanogrammus aeglefinus</i> ) .....        | 40 —   |
| Ufsi ( <i>Pollachius virens</i> ) .....              | 45 —   |
| Lýsingur ( <i>Merluccius merluccius</i> ) .....      | 30 —   |
| Skarkoli ( <i>Pleuronectes platessa</i> ) .....      | 34 —   |
| Langlúra ( <i>Gyptocephalus cynoglossus</i> ) .....  | 30 —   |
| Þykkvalúra ( <i>Microstomus kitt</i> ) .....         | 30 —   |
| Tunga ( <i>Solea solea</i> ) .....                   | 24 —   |
| Sandhverfa ( <i>Psetta maxima</i> ) .....            | 30 —   |
| Slétthverfa ( <i>Psetta psetta</i> ) .....           | 30 —   |
| Stórkjafta ( <i>Lepidorhombus whiff</i> ) .....      | 30 —   |
| Lýsa ( <i>Merlangius merlangus merlangus</i> ) ..... | 40 —   |
| Sandkoli ( <i>Limanda limanda</i> ) .....            | 20 —   |
| Steinbítur ( <i>Anarhichas lupus</i> ) .....         | 40 —   |
| Karfi ( <i>Seliastes marinus</i> ) .....             | 500 gr |

Einnig er bannað að kaupa eða selja fisk, sem telst til þessarra tegunda, ef hann er smærri en segir í þessari grein. Þrátt fyrir ákvæði þessarar greinar má þó 5% af karfafla hvern veiðiferðar vera undir 500 gr. að þyngd hver fiskur. Þá skal óheimilt á tímabilinu 1. nóvember til 15. mars að landa steinbít, sem nemur meir en 5% af afla skips í hverri veiðiferð.

### 7. gr.

Eigi ná ákvæði reglugerðar þessarar til fiskveiða í þágu vísindalegra rannsókna né til fisks, sem í slíkum veiðiferðum er veiddur.

### 8. gr.

Brot gegn ákvæðum reglugerðar þessarar varða refsingu samkvæmt 12. gr. laga nr. 102 27. desember 1973, um veiðar með botnvörpu, flotvörpu og dragnót í fisk-veiðilandhelginni. Um tilraun og blutdeild fer samkvæmt almennum ákvæðum III. kafla almennra hegningarlaga nr. 19 12. febr. 1940.

**9. gr.**

Reglugerð þessi er sett samkvæmt 9. gr. laga nr. 102 27. desember 1973, um veiðar með botnvörpu, flotvörpu og dragnót í fiskveiðilandhelginni til þess að öðlast þegar gildi og birtist til eftirbreytni þeim, sem hlut eiga að máli.

**Bráðabirgðaákvæði.**

Þrátt fyrir ákvæði 1. og 2. gr. reglugerðar þessarar er heimilt í tvö ár frá gildistöku reglugerðarinnar að nota þau botnvörpunet, sem til eru eða ráðstafanir hafa verið gerðar til þess að afla fyrir gildistöku hennar, enda séu þau gerð samkvæmt þeim reglum, sem giltu fyrir gildistöku reglugerðarinnar.

*Sjávarútvegsráðuneytið, 16. maí 1974.*

**Lúðvík Jósepsson.**

*Þórður Ásgeirsson.*